

Inatsisissatut siunnersuummut oqaaseqaatit

Oqaaseqaatit nalinginnaasut

1. Inatsisissatut siunnersuutip tunuliaqutaa

Naalackersuisut akileraarutininik allannguinnissamik siunnersuuteqarnissaq aalajangiuppaat. Allannguinnissap ilaatigut kingunerissavaa nunamut tamarmut akileraarutip 2013-imiit 1 procentimik appartinneqarnissaa, tak. 2013-imi aningaasanut inatsisissatut siunnersuummi siunertanut kontumut 24.10-mut oqaasertaliussaq (UKA 2012/xx).

Akileraarutit 1 procentimik appartinneqarnerat landskarsip isertitassatigut 72 mio. kr.-inik anaasaqaatigissavaa.

Inatsisissatut siunnersuut una akileraarutininik allannguinnissap aningaasalersorneqarnissaanut ilaavoq, aammalu aningaasarsianit akileraarutit pillugit Inatsisartut inatsisaata, qalerallit avataasiorluni aalisarnermi pisarineqartut akitsuutaat pillugu Inatsisartut inatsisaata kiisalu nioqutissanik eqqussuinermi akitsuutit pillugit Inatsisartut inatsisaata allanngortinneqarnissaanik siunnersuutininut uunga ilutigitillugu saqqummiunneqartunut attuumassuteqartinneqassalluni.

Siunnersuutikkut atuutilersinniarneqarpoq akileraarutit qaffakkiartuaarnerisa atsikkutiginnerulernissaat, soorluttaaq qamutininik motorilinnik avatangiisinik mingutsitsinikinnerusunik atuineruleriartorneq pilertornerulersinneqassasoq.

2. Siunnersuutip pingaarnersai

Inatsisissatut siunnersuutip kinguneranik oqimaassuseq akunnattoq (901 kg.-miit 1.500 kg. angullugit) oqimaassutsinut marlunnut agguarneqassaaq, tassalu 2) qamutit motorillit 901 kg.-miit 1.200 kg. angullugit oqimaassusillit aamma 3) qamutit motorillit 1.201 kg.-miit 1.500 kg. angullugit oqimaassusillit.

Oqimaassutsimut nutaamut tunngatillugu oqaatigineqassaaq oqimaassutsit maannakkut atuuttut misissorneqarneranni isumaqarnarmat, oqimaassuseq 2-mi (901 kg.-miit 1.500 kg. angullugit) pineqartut 600 kg.-t oqimaassuseq 3-mi (1.501 kg.-miit 1.800 kg. angullugit) pineqartunut 300 kg.-nut sanilliullugit annertuallaartut.

Oqimaassutsimiittut 600 kg.-t annertuallaarnerat ilaatigut qamutit motorillit anginerusut or-sussamik km.-imut atuinerusartut, qamutitut motorilinnut mikinernut sanilliullutik avatan-giisinik mingutsitsinerusarnerannut attuumassuteqartinneqarpoq. Tassa imaappoq qamutit motorillit assigiimmik akileraarutillit avatangiisinik mingutsitsinerat assigiinngitsorujussuu-sinnaavoq.

Akileraarutit qaffakkiartuaarneri oqimaassutsimik agguaanikkut atsikkutigiinnerulissapput, tassami oqimaassutsit imarisamikkut assigiilissammata.

Oqimaassutsimik agguaanerup kingorna qamutit motorillit 1.201 kg.-miit 1.500 kg. angullu-git oqimaassusillit akileraarutaat 10.049 kr.-iniit 12.142 kr.-inut qaffanneqassapput, tassa aki-leraarutit ukiumut 2.093 kr.-inik amerlissallutik.

Oqimaassutsit allat akileraarutaasa allannguuteqaratik suli taamaaginnarnissaat siunnersuutaavoq.

3. Pisortanut aningaasatigut allaffissornikkullu sunniutissai

Oqimaassutsimik agguaneq landskarsip ukiumut 3 mio. kr.-it missinginik isertitaqarnerusa-lernissaanik kinguneqassaaq.

Akileraarutitik siusinnerusukkut qaffaasimaneq kingumut qiviarlugu naatsorsuutigineqarpoq, inuit biiliisa oqimaannerusut ikiliartuaarneri ilutigalugit biilit mikinerusut avatangiisinillu mi-ngutsitsinikinnerusut amerliartornissaat oqimaassutsimik agguaanerup kingunerissagaa. Al-lannguutissat taakku piffissaq ungasinnerusoq eqqarsaatigalugu isertitassatigut sunniutissat eqqoriarneqarsinnaasimangillat.

Siunnersuut allaffissornermut annertuumik sunniuteqassangatinneqanngilaq.

4. Inuussutissarsiutinik ingerlataqartunut aningaasatigut allaffissornikkullu sunniutissai

Siunnersuut inuussutissarsiutinik ingerlataqartut aningaasartuuteqarnerulernerannik kingune-qassaaq, tassa qamutit motorillit akileraarutaannut ukiup affakkaartumut aningaasartuuteqar-nerulernikkut - tassa pineqarput inuussutissarsiutinik ingerlataqartut biilnik 1.201 kg.-t 1.500 kg.-llu akornannik oqimaassusilinnik atuisut.

Inuussutissarsiutinilli ingerlataqartut qamutit motorillit akileraarutaat ingerlatsinermi ani-ngaasartuutitut ilanngaatigisinnaavaat. Tassa imaappoq akileraarutip qaffaataa tamatumani ta-makkiisumik isertinneqarnaviannngilaq.

Siunnersuut inuussutissarsiutinik ingerlataqartunut allaffissornikkut sunniuteqassangatinne-qanngilaq.

5. Avatangiisinut, pinngortitamut inuillu peqqissusiannut sunniutissai

Siunnersuut avatangiisit pinngortitarlu eqqarsaatigalugit pitsaasunik kinguneqassangatinneqarpoq.

Akileraarutininik qaffaanerup kingunerisaanik qularutissaanngilaq biilit anginerit avatangiisinik mingutsitsisut, biilininik mikinerusunik avatangiisinik mingutsitsinik innerusunik maannakkor-nit pilertornerusunik taarserneqariartuaarnissaat, tassa CO₂-mik il.il. mingutsitsinerup millisarneqarnissaanik Naalakkersuisut anguniagaannut naapertuuttumik.

6. Innuttaasunut sunniutissai

Innuttaasut, qamutininik motorilinnik 1.201 kg.-miit 1.500 kg. angullugit oqimaassusilinnik peqartut aningaasat atorsinnaasaat siunnersuutip kingunerisaanik ukiumut 2.093 kr.-inik ikili-
allassapput.

Siunnersuut innuttaasunut allaffissornikkut sunniuteqartussaannngilaq.

7. Annertuumik sunniutissai allat

Inatsisissatut siunnersuut allanik annertuumik sunniuteqassangatinneqannngilaq.

8. Oqartussaasunik soqutigisaqaqatigiinnillu il.il. tusarniaaneq

Inatsisissatut siunnersuut 2012-imi 29. juni-miit 27. juli-p tungaanut tusarniaassutigineqarsimavoq KANUKOKA-mut, Kalaallit Nunaanni Sulisitsisut Peqatigiiffiannut, NUSUKA-mut, Sulinermik Inuussutissarsiuteqartut Kattuffiannut (SIK), KNAPK-mut, Inuussutissarsiornermut Suliffeqarnermullu Naalakkersuisoqarfimmut, Aalisarnermut, Piniarnermut Nunaleriner-mullu Naalakkersuisoqarfimmut, Ineqarnermut Attaveqarnermullu Naalakkersuisoqarfimmut, Ilinniartitaanermut Ilisimatusarnermullu Naalakkersuisoqarfimmut aamma Nunamut nammi-
nermut, Pinngortitamut Avatangiisinullu Naalakkersuisoqarfimmut.

Tusarniaanermi akissuteqartuupput Kalaallit Forsikring Agentur A/S, Kommune Kujalleq, Ilinniartitaanermut Ilisimatusarnermullu Naalakkersuisoqarfik, Kommuneqarfik Sermersooq, Sulinermik Inuussutissarsiuteqartut Kattuffiat (SIK), Kalaallit Nunaanni Sulisitsisut Peqatigiiffiat (GA), Aalisarnermut, Piniarnermut Nunaleriner-mullu Naalakkersuisoqarfik, KANUKOKA, KPMG aamma Grønlands Revisionskontor.

CO₂-mik aniatitsinerup millisarneqarnissaanik kissaateqarneq Kalaallit Forsikring Agentur A/S-ip tusarniaanermut akissummini paasisinnaanerarpa. Kalaallit Forsikring Agentur A/S-

ili isumaqarpoq biilit oqimaassusiat tunngavigalugu akileraarusersuineq kukkunerusoq, biilimmi oqimaannerit biilnut oqinnernut sanilliullutik CO2-mik aniatitsinerusarnerannik oqar-neq, biilit uuliaanngitsunik ingerlatillit oqimaassusii eqqaassaagaanni eqqortuujuuaannanngim-mat. Taamaattumik Kalaallit Forsikring Agentur isumaqarpoq akileraarutit biilit orsussamik atuinerannik tunngaveqartariaqartut.

Aningaasarsiornikkut siuariartornerunissaq pisortallu aningaasaqarnerisa patajaanneruler-nissaat anguniarlugit Naalackersuisut kissaateqarput akileraartarneq, pensionisiat, isuma-ginninneq ineqarnerlu pillugit nutarterinissat arlaqartut ukiuni aggersuni ingerlanneqassa-sut.

Tassunga atatillugu biilit akileraarutaasa siunnersuutigineqartutuut allanngortiterneqarnis-saat kissaataavoq, tassa akileraarutit avatangiisinik mianerinninnerulernissamut sakkussan-ngorlugit. Taamaattorli biilit akileraarutaasa aaqqissuussaanerannik allannguinnissaq tama-tuminngalu suliaqarnissaq, nutarterinissat allat suliarineqarnissaannut atuutilersinneqarnis-saannullu ataqatigiissarneqassaaq, tassungalu atatillugu maannangaaq allanngortiterinissaq piffissaasorineqanngilaq.

Tassunga ilutigitillugu Kalaallit Forsikring Agentur-ip paasisinnaannginnerarpaa sooq qamu-tit motorillit assigiinngitsut akileraarummik akiliisussaatinneqannginnersut, soorlu assersuu-tigalugit maskiinat assaassutit qamutillu motorillit taakkununga assingusut.

Akileraarutit maanna atuuttut ima aaqqitaapput, qamutit motorillit qatserutit annaassiniutil-lu, napparsimmaveqarfiup napparsimasunik angallassissutai, qamutit motorillit nunat alla-miut aallartitaqarfiinit imaluunniit konsuleqarfiinit pigineqartut, kiisalu qamutit motorillit savaatillit tuttuutillillu aammalu allat inuussutissarsiorderanni atorineqartartut illoqarfiit nu-naqarfillu avataanni inissisimasut akileraarummik akiliisussaataitanatik, qamutimmi motoo-rillit taamaattut akileraaruteqartinneqarnissaat naleqqussorineqanngimmat.

Akileraarummik akiliisussaataitanermut aalajangiisuvoq qamutit motorillit Kalaallit Nu-naanni angallanneq pillugu inatsit naapertorlugu nalunaarsorneqartussaataitanersut. Taa-maammatt qamutit motorillit aalajangersimasut nalunaarsorneqartussaataitaanngikkunik aki-leraarummik akiliisussaataitaanngeratarsinnaapput.

KANUKOKA aamma Kalaallit Nunaanni Sulisitsisut Peqatigiiffiat (GA) angallannerup ava-tangiisinut pitsaanerulissutaasumik aaqqiivigineqarnissaa pillugu Kalaallit Forsikring Agentur A/S-ituulli isumaqarput, siunnersuummulli allanik oqaaseqaatissaqaratik.

Tassunga tunngatillugu innersuussutigineqarput Kalaallit Forsikring Agentur A/S-ip tamanna pillugu oqaatigisaanut akissutigineqartut.

Kommune Kujalliup tusarniaanermut akissummini oqaatigaa akileraarutininik allannguiniarneq iluarigitsik, soorlu aamma siunnersuutit imarisaat arlaqartut iluarinartikkitik, ilaatigut soorlu qamutit motorillit akileraarutaat pillugit allannguutissatut siunnersuut.

Taamaattorli Kommune Kujalleq isumaqarpoq allannguutigitinniakkat utaqqissunneqartariaqartut, tassungali taarsiullugu nutarterinissamik pilersaarutit ilaat ukiuni 2013-imi, 2014-imi 2015-imilu atuutilersinneqassasut.

Aaqqissuussinernik nutarterinissatut pilersaarutigineqartut ukiut amerlanerusut ingerlaneranni suliarineqarnissaat kiisalu piffissanut assigiinngitsunut agguataagaanissaat siunnersuutaavoq, inuiaqatigiimmi atugarissaartut aningaasassaqartinneqartuarnissaat – aamma nutarterinerup nalaani - qulakkeerneqartariaqarmat. Tassa imaappoq, nutarterinissamik pilersaarutit aningaasalersuinissaq, atuutilersitsinissaq aammalu siunissami anguniakkat angunissaat eqqarsaatigalugit eqqarsaatigilluagaassapput.

SIK-p tusarniaanermut akissummini oqaatigaa qamutit motorillit akileraarutaannik allannguinikkut isertinneqartussat, akileraarutitigut akitsuutitigullu allannguutit allat isertitsissutaanissaannut sanilliullutik ikittuinnaasut. SIK allannguinermut tunngatillugu allanik oqaaseqaatisaqanngilaq.

Allannguinerup siunertaraa akileraarutit atsikkutigiiamnik qaffakkiartortuunissaat kiisalu qamutininik motorilinnik avatangiisinik mingutsitsinikinnerusunik atuinertornerup piler-tornerulersinnissaa.

Kommuneqarfik Sermersuup tusarniaanermut akissummini oqaatigaa allannguutissatut siunnersuut Kalaallit Nunaanni biiliutigineqartut allannguuteqarnissaannik kinguneqassangatinngikkitsik. Taamaattumik Kommuneqarfik Sermersooq siunnersuuteqarpoq qamutit motorillit akileraarutaat allanngortiterneqassasoq, taamaaliornikkut qamutit motorillit orsussamik atuinerat apeqqaatillugu akileraarummik akiliisitsisoqartalersillugu.

Kalaallit Forsikring Agentur A/S-ip tamanna pillugu oqaatigisaanut akissutigineqartut inner-suussutigineqarput.

Aamma Kommuneqarfik Sermersuup oqaatigaa qamutit motorillit inuussutissarsiorterinnarmut atugassatut nalunaarsorneqarsimasut immikkut ittunik maleruagassiuunneqarnissaat isumaliutigineqartariaqartoq.

Isumaliutersuutit tamakku, biilit akileraarutaasa aaqqissuussaanerannik siunissami allanngortiterinissami ilanngunneqarumaarput.

Kommuneqarfik Sermersooq naggasiilluni oqarpoq biilininik innaallagissamoortunik akileraarummik akiliisussaatsinngikkallarnerup maanna atuuttup sapinngisaq tamaat sivitsorneqar-

nissaa, immaqaluunniit atuuttuaannarnissaa kissaatiginartoq. Tamanna siunnersuummut ilanngunneqartariaqartoq Kommuneqarfik Sermersooq isumaqarpoq.

Inuit biiliisa biilillu assartuutit brintiinnarmik innaallagiaannarmilluunniit ingerlatillit akilerarummik akiliisussaatinneqannginnerannik sivitsuinissamik atuutsitsuarnissamilluunniit isumaliutersuutit, biilit akileraarutaannik aaqqissuussinerup siunissami allanngortinneqarnissaanik suliaqarnissami ilanngunneqarumaarput.

Inuit biiliisa biilillu assartuutit innaallagiaannarmik brintiinnarmillu ingerlatillit nioqqutissanik eqqussuinermi akitsuummik aamma qamutit motorillit akileraarutaannik akiliisussaati-taanngikkallarnerat Inatsisartut inatsisaanni nr. 1, 17. maj 2010-meersumi aalajangersagaa-voq. Akiliisussaati-taanngikkallarneq sivitsorneqassappat inatsit taanna allanngortinneqartariaqassaaq.

Ilinniartitaanermut Ilisimatusarnermullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, KPMG aamma Grønlands Revisionskontor siunnersuummut oqaaseqaatissaqanngillat.

Aalajangersakkanut ataasiakkaanut oqaaseqaatit

§ 1, nr. 1-imut

Siunnersuutaavoq qamutit motorillit 901 kg.-miit 1.200 kg. angullugit oqimaassusillit akilerarutaat 10.049 kr.-iussasoq, qamutillu motorillit 1.201 kg.-miit 1.500 kg. angullugit oqimaassusillit akilerarutaat 12.142 kr.-iussasoq.

Siunnersuutaavoq oqimaassutsit sinnerisa akilerarutaat allanngortinnagit atuutitiinneqassasut.

§ 2-mut

Inatsisissatut siunnersuutip 1. januar 2013-imiit atuutilernissaa siunnersuutaavoq, taamaattorli akilerarutit qaffanneqartut aatsaat 1. april 2013-imiit atuutilersillugit.